

Maturalna ekskruzija

Šta za nas označava iskustvo maturalnog putovanja, rekreaciju u odrastanju i obrazovanju ili samo ludi provod? Možemo li za nekoliko dana odrasti i postati drugačije osobe i dokazati našu zrelost? Na ova pitanja nije lako odgovoriti, ali sam sigurna da svaka osoba ima svoje iskustvo, a mi, generacija 2014-2018. godine napokon smo dobili priliku da krenemo na naše životno putovanje. Nakon četiri godine obrazovanja konačno je došao dan kada su naši snovi o ekskurziji postali java. Sve je bilo spremno za devet željno iščekivanih dana u Italiji, Španiji i Francuskoj koje smo trebali posjetiti tokom našeg obrazovnog odsustva.

Dan našeg polaska je planiran za 22. septembar, nestrpljenje i iščekivanje je raslo, a odbrojavanje posljednjih sati je odavno započelo. Posljednjih sat vremena boravka u Sarajevu ukazivao je da je naše zajedničko druženje otpočelo, te da ćemo za nepunih sat vremena doći ispred Muzeja kako bi zauzeli naša putnička mjesta u autobusu agencije Biss Tours.

Naše prvo odredište je bilo Italija, tačnije gradić Lido di Jesolo u kojem smo proveli dva dana, te smo imati priliku posjetiti Kraljicu Jadrana – Veneciju, Trg Svetog Marka, Most Rialto, Most uzdaha i, naravno, obavezno degustiranje poznate italijanske pice.

Naš drugi dan je bio vezan za grad Veronu, najpoznatije mjesto ljubavi sa tragičnim završetkom, svima poznati romantični par Romeo i Julija. Svi smo bili oduševljeni posjetom Julijinoj kući, pored koje se nalazila suvernirnica u kojoj smo imali priliku kupiti „katančiće ljubavi“. Postoje različita tumačenja tih katančića, ali meni najinteresantnije je da parovi koji se potpišu na zid i okače svoje katance ostaju zauvijek zajedno. Svi smo različitih vjerovanja, ali mislim da je divno ostaviti dio ljubavi u ovome gradu.

Naredna četiri dana imali smo priliku provesti u Loret de Maru, gradiću Španije, gdje smo iskoristili naše vrijeme za sportske aktivnosti i igre bez granica na istoimenoj pješčanoj plaži. Za mnoge od nas veliki doživljaj ostala je posjeta Nou Campu. Mnogi kažu da ako se tokom boravka u Španiji ne posjeti ovaj stadion kao da uopće nismo ni bili u Španiji, na našu sreću mi smo ga posjetili. Svima nama najinteresantniji trenuci su bili u večernjim satima kada smo mogli osjetiti čari noćnog života u Disco Tropics-u, gdje smo na naše veliko zadovoljstvo susreli poznatog bosanskohercegovčkog muzičara Amela Ćurića i uživali smo u njegovom repertoaru. Posebno bogatstvo za sve nas bilo je upoznavanje novih drugara iz naše lijepe Bosne i Hercegovine koji su također bili na maturalnoj ekskurziji.

Milano, naša posljednja destinacija je grad u kom smo probali najpoznatiji sladoled Magnum i čijim smo trgovom Duomo šetali uživajući.

Najtužniji dio našeg putovanja bio je dan u kom smo se trebali vratiti kućama u Sarajevo. Putovanje za nezaborav uz puno suza radosnica, pjesme, toplih prijateljskih zagrljaja značilo je da su mladalački snovi započeli i da će biti odsanjani u skorijoj budućnosti.

Shvatili smo da iskustvo maturalnog putovanja za nas ne označava samo ludi provod već rekreaciju u odrastanju i obrazovanju. Naravno da za devet dana nije moguće odrasti i postati zrelijom osobom, ali možemo steći nova iskustva prilikom druženja sa našim prijateljima, kao i našim profesorima koji

nam za ovih devet dana postaju mala porodica. Također, shvatili smo da je istinita tvrdnja da sve što je lijepo kratko traje, pa tako i naša ekskurzija.

Napisala učenica Maja Maksumić, IVa